

# Xajon ra tsikínda ítjòn jè Pablo ra isìkasén-la jè Timoteo

Kó'sín síhixo'ta Pablo jè Timoteo

**1** <sup>1</sup>ʼAn Pablo, tíbindá-la xajon rakìi, ʼan ra ko'sín tsikíxáya-na Jesucristo koni 'sín kitsjà kjohixi Nainá ra bachrjekàjin-ná kjohi'in ko Jesucristo ra tíjna ítjòn-ná nga inchihiñá-lá kjonda-la. <sup>2</sup>Ngaji Timoteo, ra koni tsa i'ndí-na xin-la nga ʼan tsakon-yá nda-la koni 'sín makjiín-ná a'ta 'tse Cristo. Nainá ra Na'ín-ná ma ko jè Jesucristo ra tíjna ítjòn-ná katatsjá-li kjonda, katamahimake-li, ko kata'se-la kjo'nchán ya ajin inìma-li.

Kó'sín síkondeé a'ta 'tse xita ra kj'íi kjobítsjen bakón-ya

<sup>3</sup>Koni 'sín tsikitsá'ba-la 'kia nga kia ya ján nangi Macedonia nga kixian-la, ya tíjni naxindá Éfeso mé-ni nga ji kichjákjaya-la xita ra kj'íi kjoa inchi bakón-ya ya ajin naxindá-la Nainá. <sup>4</sup>Ngaji Timoteo, 'koaá 'sín tinè-la jñà xita kii, kii jñà sísin-la kuendo jchínga ra mì tsa kixi kjoa, tí'koaá kii jñà sísin-la kjoa ra mì kii fehe'ta 'tse xita jchínga kjoatseeé. Kjoa kii, ni mé chjí-la. Tà síkjaán-kjo-ná. Mì kii basiko-ná nga makjiín-ná a'ta 'tse Cristo mé-ni nga kama síhitjasón-ná koni 'sín nga mejèn-la Nainá.

<sup>5</sup>Kjoa ra tíbiné-la, jé-ní nga kata'se-ná kjotsjacha. Tanga ítjòn machjeén nga tsje katijna inìma-ná ko tsje katijna kjobítsjen-ná ko ngi nda katakjiín-ná a'ta 'tse Cristo. 'Koaá 'sín kama-ni nga nda kotsjacheé xàngieé. <sup>6</sup>Tanga tíjn i'ka xita ra tsincha'taxìn-la kjoa kii; ta xín ndiyá tíjmaya; ta kii sísin-la 'én ra nímé chjí-la. <sup>7</sup>Mejèn-la maestro 'tse kjoatexoma-la Nainá kítsajna. Tanga jñà, nda mí kii

machiya-ilā 'én ra chja nga 'ñó chja nga tsò nga kixií kjoa 'én ra bakón-ya.

<sup>8</sup>Tjijin-ná nga jè kjotéxoma ra kitsjà Nainá ndaá tjín tsa kò'sín kochjeén koni 'sín mejèn-la Nainá. <sup>9</sup>'Ya-ná nga jè kjotéxoma-la Nainá, mì tsa 'tse-jìn jñà xita ra nda 'sín. 'Tseé-ní xita ra mì kì 'nchréhijon kò ra mì kì síhitjasòn; 'tseé-ní xita ra mì kì bexkón Nainá kò ra bátsji-jé; 'tseé-ní xita ra mì kì tsje tjín kjobítsjen-la, ra tjé betákon jè kjoa tsje-la Nainá; ti'koaá 'tseé-ní xita ra sí'ken na'in-la kò na-la, kò nga'tsi ra xita sí'ken. <sup>10</sup>Ti'koaá 'tse-ní jñà xita ra kjoachijngi 'sín, kò jñà xita 'xin ra ti xita 'xin xákjén fahijoko-ni, kò xita ra fikò chijé xákjén nga batína. Ti'koaá 'tse-ní jñà xita ndiso kò xita ra mì tsa 'én kixi chja, kò xita ra 'cho tjín kjoa ra 'sín ra kondra fi-la kjobítsjen ra nda tjín. <sup>11</sup>Koaá 'sín bakón-ya jè 'én nda ra jeya tjina a'ta 'tse Cristo ra kitsjà Nainá ra tse kjonda tíjnajin; kò 'aán isìngatsja-na mé-ni nga kichjàya.

### Kjonda-la Nainá a'ta 'tse Pablo

<sup>12</sup>Tse kjonda kata'se-la Jesucristo ra tjina ítjòn-ná nga kitsjà-na nga'ñó ti'koa nda kijtsetákon-na nga 'an isìngatsja-na xá-la. <sup>13</sup>Ni'sín 'kia nga ti'sa ítjòn, 'ñó 'cho kí'siaan, kíchjàjnoó-la Nainá, kondraá tsakátijna-la, toón kítsee jñà xita-la. Tanga kjòhìmakeé-na Nainá. Nga kií kò'sín kí'sin-na nga kjè kì be kò kjè kì makjiín-na a'ta 'tse Cristo. <sup>14</sup>Tanga jè kjotjò-la Na'in-ná isaá 'ñó tse kitsjà-na, ti'koa tsasikoó-na nga kjomà kjokjiín-na kò kitsjà-na kjotsjacha-la nga jè Cristo tíjnako.

<sup>15</sup>Jñà 'én kii, ngi 'én kixi-ní. Machjeén-ní nga kòkjiín ijye-la xita nga jè Jesucristo 'ji i isà'nde nga kochrjekàjin kjohi'in nga'tsi xita ra jé tjín-la. Tjina ítjòn kjòon ra 'an nga isa 'ñó 'cho kí'siaan tà nga'tsi xita. <sup>16</sup>Tanga ni'sín 'ñó 'cho kí'siaan, jè Nainá ki'se-la kjòhìmatakòn ra a'ta tsa'an. Jñà xita, 'kia nga ske kó'sín nga isiko-na Jesucristo nga 'ñó tjín-la kjojetakòn, ti'koaá kòkjiín-te-la a'ta 'tse Cristo nga 'se-la kjobinachon nita mé nichjin-nioo. <sup>17</sup>Nainá 'nga katijna, kata'se-la kjoajeya nita mé nó kò nita mé nichjin-nioo. Nga jè tíbatéxoma ki'ta kò mì kì kjehe'tà nichjin-la nita kjiá-nioo, ti'koaá mì kì tsijen-ni nándà tjina, ngi tà jé tajngo-ni ra Nainá. Kò'sín katama.

<sup>18</sup>Ngaji Timoteo ra koni tsa i'ndí-nā xin-la, yaá singátsja-la 'én kii, koni 'sín kitsò xitā ra isichjeén Nainá nga kiichja a'ta tsaji, mé-ni nga a'ta 'tse 'én kii, tsjá-li nga'nó nga nda sixá-la Nainá koni 'sín sixá jngo chíchàn. <sup>19</sup>Nda katakjiín-li a'ta 'tse Cristo ti'koa nda katijna kjobítsjen-li. Tjín i'ka xitā ra mì kì isisin kjobítsjen ra nda tjióon. 'Koaá 'sín kjomà-ni nga isìkítsón kjoa ra makjiín-la. <sup>20</sup>'Koaá 'sín kjomà'tin jè Himeneo ko Alejandro ra 'an isíkítsajnakò xita-níí, mé-ni nga katakixiya-ni nga mì kì taxkì kichajno-la Nainá.

### Machjeén-ní nga kítsa'batjié xàngieé

**2** <sup>1</sup>Jè kjoa ra isa 'nó machjeén, 'koaá 'sín tíbiné-no nga titsa'batjiè nga'tsi xitā, tinákjoa'ta-la Nainá, ti'koa titsa'ba-te-la, ko'sín 'tin-la jè Nainá nga tse kjonda kata'se-la ra jè a'ta 'tse nga'tsi xitā ra tjín nga tjítja isà'nde. <sup>2</sup>Machjeén-ní nga kítsa'batjié ra xitaxá ítjòn títsajna ko nga'tsi ra kjetéxoma tjíya tsja, mé-ni nga 'nchán kitsajna-né ti'koaá tafi tafi sijché ijo-ná ti'koaá jchaxkén Nainá ko jchaxkén kjoa ra nda tjióon. <sup>3</sup>'Kia nga ko'sín 'sieén, ndaá tjín ko ndaá sasén-la Nainá ra bachrjekatji-ná kjohi'in. <sup>4</sup>Nainá, jè ra mejèn-la nga nga'tsi xitā kitjokajin kjohi'in ti'koa sijin-la kó'sín tjín ra ngi kjohixi. <sup>5</sup>Jngoó-ni ra Nainá; ti'koaá ta jngoó ma-ni xitā ra chjatji-ná a'ta 'tse Nainá, jè xitā ra Jesucristo 'mì. <sup>6</sup>'Kia nga ijchò nichjin nga ko'sín tjínda-la Nainá, Jesucristo kitsjà kjetjó ijo-la nga 'ken mé-ni nga kjóchjítji-ni nga'tsi xitā. 'Koaá 'sín ki'sin Nainá mé-ni nga kjomà kijtse-ni nga'tsi xitā. <sup>7</sup>'Aán kjongatsja jè xá rakii nga 'an tsikíxáya-na Cristo, nga kichjāya 'én nda-la ti'koa kokon-yá-la jñā ra mì tsa xitā judío nga kokjiín-la a'ta 'tse Cristo ti'koa ske ra kjohixi. 'Én kixíí ra tíxin-la, mì tsa 'én ndiso-jin.

### Kó'sín tjínè-la nga 'sijn ra xitā 'xin ko íchjín

<sup>8</sup>A'ta 'tse xitā 'xin, jé ra mejèn-na 'kia nga kichja'ta-la Nainá ta nānda i'nde títsajna, tsje katasíkítsajna inima-la 'kia nga skiímítjen-la tsja Nainá. Kì kjoiti tjín-jìn inima-la ko kì inchikjaán-kjo-jìn. <sup>9</sup>Ti'koa jñā íchjín, jñā nikje ra nda bakèn-la katjaya. Chi chiba kátinda ijo-la mé-ni nga mì xitā 'cho skoòtsjen-jnó-ni. Kì jñā nikje ra 'nó chjí-la faya. Kì taxkì bí'ta sko ko ya ijo-la tsajmì ra 'nó chjí koni kichā oro ko perla. <sup>10</sup>Tà

isaá jñá kata'sín xá ra nda t́jín koni 'sín bakèn-la jñà íchjín ra bexkón Nainá. <sup>11</sup>Jñà íchjín jyó katitsajna 'kia nga chitá'yá 'én-la Nainá; kata'nchréhijon-la jè ra bakón-ya. <sup>12</sup>'An, mì kì tsja'ndée nga jñà íchjín kotèxoma-la jñà ra xita 'xin tì'koa nga jñà kòkòn-ya-la. Jñà íchjín, jyó katitsajna. <sup>13</sup>Tà ngatjì-la jè Nainá, ítjòn tsikínda Adán, kò askaán tsikínda Eva. <sup>14</sup>Mì tsa jè Adán ra ichìndocha-la; jé chjoón-ní. 'Koaá 'sín kjomà-ni nga isakò jé-la. <sup>15</sup>Tanga jñà íchjín, tsa sihitjasòn koni 'sín mejèn-la Nainá nga 'se-la ixti, kítjokajiín kjohi'in. Machjeén-ní nga ngi nda t́jín ikon nga kòkjiín-la a'ta 'tse Cristo, tì'koa 'se-la kjotsjacha, kò tsje kítzahijyoko Nainá nga nda sùjchá ijo-la.

### Kjoa ra machjeén 'tse xita ra síkinda naxindá-la Nainá

**3** <sup>1</sup>Jè 'én rakì, ngi 'én kixi-ní: tsa t́jín jngo xita ra mejèn-la xá nga naxindá-la Nainá sùkinda, ñó nda t́jín xá ra mejèn-la. <sup>2</sup>Jè xita ra síkinda naxindá-la Nainá machjeén-ní nga nda 'siin mé-ni nga nì yá ra 'cho kítso-la. Jngoó chjoón 'se-la; jngo xita ra inda t́jín ikon; xita ra nda kosòn-la ijo-la; xita ra 'yaxkón nga ndaá tísíjchá ijo-la; ra ndaá sísin-la xita ra bijchójkon ni'ya-la; xita ra nda ma-la bakón-ya; <sup>3</sup>ra mì tsa xita 'chi; ra mì tsa xita kjaán-kò; ra mì tsa ton chijé matsjake. Jé machjeén xita ra nda xita, ra mì kjosi sísin, ra mì tsa ton kájno-la. <sup>4</sup>Machjeén-ní nga nda kotèxoma ya ni'ya-la; kò jñà ixti-la nda katasíkixi, mé-ni nga sihitjasòn-la kò nda skexkón xita xákjín. <sup>5</sup>Tsa mì kì ma-la batèxoma ni'ya-la, ¿kó'sín kama sùkinda-ni xita naxindá-la Cristo? <sup>6</sup>Jè xita ra síkinda naxindá-la Nainá jé machjeén ra ijye kjotsee kjokjiín-la, mé-ni nga mì 'nga ikon koma-ni askan-nioo nga mì kjohi'in sakò-la koni 'sín kjomà'tin jè xita-ní. <sup>7</sup>Machjeén-ní nga nda sùjchá ijo-la mé-ni nga skexkón-ni xita ra mì kì makjiín-la a'ta 'tse Cristo, nga mì 'cho kájna, nga mì jè xita-ní sùkijne-la.

### Kjoa ra machjeén 'tse xita ra kosiko'ta naxindá-la Nainá

<sup>8</sup>'Koaá tì'sín t́jín 'tse xita ra sihitjasòn xá nga kosiko'ta xita naxindá-la Nainá; jñà machjeén xita ra 'yaxkón nga ndaá inchisíjchá ijo-la; mì kì koma sùkkaatjìya-la 'én ra kichja. Mì kì koma xán kohijtako; mì kì koma ton chijé kotsjake. <sup>9</sup>Machjeén-ní nga nda katafi'ta-la kjoa ra t́jì'ma ra ijye tsakón Nainá koni 'sín makjiín-ná ra a'ta 'tse Cristo. Tì'koa

machjeén-ní nga tsje katasíkítsajna kjobítsjen-la. <sup>10</sup> Jñà xita ra sihitjasòn xá nga kosiko naxindá-la Nainá, ítjòn katachí'ta tsa nímé kjoa tjin-la, akjòn 'kiaá katasíhitjasòn. <sup>11</sup> 'Koaá tì'sín tjin 'tse íchjín; jñá machjeén ra 'yaxkón nga ndaá inchisíjchá ijo-la; jñà ra mì 'én ndiso chja; jñà ra inda tjin ikon; jñà ra nda síhitjasòn ijye ta mé kjoa-nioo. <sup>12</sup> Jñà xita ra sihitjasòn xá nga kosiko naxindá-la Nainá, machjeén-ní nga tà jngoó chjoón 'se-la; nda katatéxoma-la ixti-la ko xita ra tjihijyo ya ni'ya-la. <sup>13</sup> Jñà xita ra nda sihitjasòn xá kii, isaá nda jchaxkón ko isaá 'ñó nda 'se ikon koni 'sín makjiín-la a'ta 'tse Cristo Jesús.

### Kjoa'ma-la Nainá ra ijye tsakón

<sup>14</sup> Mején-na nga íjkon nditon-la, tanga tsa kíí nichjin-la kichjin-na, 'koaá ma-ni nga tíbindá-la xajon rakii, <sup>15</sup> mé-ni nga jcha-ni kósín kitsajnakeé xita xangieé ya ajin naxindá-la Nainá ra tijnakon. Jñà xita naxindá-la Nainá, yaá tjíya tsja 'én kixi-la Nainá. <sup>16</sup> Ngi 'én kixi-ní nga 'ñó jeya tjina jè kjoa ra tji'ma-la Nainá ra ijye tsakón koni 'sín nga 'yaxkén Nainá. Kíí tsò:

Nainá, xitaá kjomà nga 'ji i isà'nde,  
 a'ta 'tse Inìma Tsje-la kijchaá-la nga tjin-la kjohixi,  
 jñà ikjalí kijtse-ní;  
 'én-la, ki'senajmíya-la nga'tsì ra mì tsa xita judío;  
 nga tji'tsa isà'nde kjokjiín-la xita a'ta 'tse Cristo;  
 jeyaá itjábétjò-ni ján ngajmi.

### Xita ra mì tsa 'én kixi kokòn-ya

**4** <sup>1</sup> Tanga jè Inìma Tsje-la Nainá ndaá 'bénajmíya-ná nga tsò: 'kia nga tà chiba nichjin chija-isa nga kj'íí india-ni Na'ín-ná, 'seé xita ra mì kì tì kokjiín-la a'ta 'tse Cristo. Yaá kiji'ta-la inìma 'cho-la níí ra kondacha ko kjobítsjen-la níí sihitjasòn-la. <sup>2</sup> Jñà kji'nchré-la xita ndiso ra jò isén tjin-la. Xita kii, nga ijye kjótajajín kjobítsjen-la, mì tì kindá fiko-ni kjoa'cho ra inchí'sín. <sup>3</sup> Jñà xita kii, mì kì tsjá'nde nga kixan xita. Tì'koaá tjin tsajmì ra ma chine, ra mì kì tsjá'nde nga koma chjine. Tanga tsajmì kii, Nainá tsikínda nga tjinè-la nga koma skine xita ra makjiín-la ko ra nda be kjohixi. 'Kia nga skine, kichja'tá-la Nainá nga kitso-la: “Tse kjonda kata'se-li Na'in a'ta 'tse tsajmì kii.” <sup>4</sup> Nga'tsì tsajmì ra Nainá tsikínda,

nda-ní, mì kì koma kìnáchrjengieé. Komaá sichjeén ijyeé tsa kìnákjoa'tá-lá Nainá 'kia nga sichjeén nga 'kín-lá: “Tse kjonda kata'se-li Na'in.” <sup>5</sup> Jè 'én-lá Nainá sítsjeé tsajmì, kò tì'koaá matsjeé-te 'kia nga nakjoá'ta-lá Nainá.

### Jngo chí'nda-lá Cristo ra nda síxá

<sup>6</sup> Ji, tsa kò'sín kòkón-ya-lá jñà xítà xàngieé kjoa kii, 'nó nda síxá'ta-lá Cristo Jesús. 'Nó nda sijin-isa-li kjobítsjen a'ta 'tse 'én ra makjiín-ná kò kjobítsjen ra nda tjín ra nda tji'mìtjìngi-lá.

<sup>7</sup> Tanga kì taxkì nisin-lá 'én jhínga 'tse isà'nde ra nímé chjí-lá ra tà kjobítsjen-lá xítà. Tinè-lá ijo-li nga jchaxkín Nainá. <sup>8</sup> Tsa kínè-lá ijo-ná nga 'kí-lá nga'nó, sakó chiba-la kjonda, tanga tsa kínè-lá inìma-ná nga nda jchaxkén Nainá, isáá sakó-ná kjonda ra machjeén-ná nga ki'ta nìchjin. Sakó-ná kjonda i a'ta nangi kò ján ngajmì. <sup>9</sup> 'Én kii, 'én kixi-ní.

Machjeén-ní nga katakjiín ijye-lá xítà. <sup>10</sup> Kii kò'sín biné-ilá xá ijo-ná, tì'koa níkieén kjohi'in, nga jé inchichiñá-lá Nainá ra tijnakon ra ma-lá bachrjekàjin kjohi'in nga'tsi xítà. Tanga tà jñà kjon kitjokajin kjohi'in jñà ra makjiín-lá a'ta 'tse Cristo.

<sup>11</sup> Kò'sín tatexoma-lá xítà, tì'koa kò'sín takón-ya-lá 'én kii.

<sup>12</sup> Kì yá ra bachrjengi-li nì'sín isa i'ndí ra ji. Ya ajin-lá xítà ra makjiín-lá a'ta 'tse Cristo, jii nda 'tin ítjin mé-ni nga skiíngi-li xítà kò'sín nakjí, kò'sín nga 'nì, kò'sín nga tsjacha 'yi Nainá kò xítà, [kò'sín nga nda tìjna inìma-li], kò'sín nga makjiín-li a'ta 'tse Nainá, kò kò'sín nga tsje tjiníjchí ijo-li ya ngixkon Nainá.

<sup>13</sup> Skanda 'kia nga kijchòjkon-la, 'koaá 'sín 'tìin: chjítá'yájin-lá xítà 'én-lá Nainá; kò'sín tinè-lá nga 'nó kata'bé-lá ikon; tì'koaá takón-ya-lá. <sup>14</sup> Kì niijchaàjin nga síxá'ta-lá Nainá a'ta 'tse kjotjò ra itjábé-li 'kia nga jñà xítà jhínga-lá naxindá-lá Nainá tsakásòn-li tsja nga jñà kùichja ngajo-lá Nainá a'ta tsaji.

<sup>15</sup> A'ta 'tse kjoa kii, kji'tá nìchjin chjítá'yákii, tì'koa tixákii mé-ni nga ske-ni xítà nga tímajchíngako-ní kjoa kii. <sup>16</sup> Nda tìkondii ijo-li mé ra 'nì. Tì'koa 'tìin kinda jè 'én ra bakon-ya-lá xítà. Kixi tìjni. Tsa kò'sín síhitjasòn, ngaji kítjokajin-ní kjohi'in; tì'koaá kitjokajin jñà xítà ra 'nchré-li.

### Kjonda ra machjeén a'ta 'tse xítà ra kj'íi

**5** <sup>1</sup> Jè ra ijye nàmihí'xtín, kì taxkì níjaká-la; 'koaá 'sín 'tènajmíya-lá koni tsa na'in-li ma; tì'koa jñà ra isa íxti,

'koaá 'sín 'tènajmíya-la koni tsa ixti 'ndsì ma. <sup>2</sup>Jñà ndí íchjín ra ijye nahí'xtín, 'koaá 'sín 'tènajmíya-la koni tsa na-li ma. Jñà ra ixti íchjín-isa, 'koaá 'sín 'tènajmíya-te-la koni tsa tichji ma, kò ngi tsje katijna kjobítsjen-li.

<sup>3</sup>Tisikoo jñà íchjín ra ijye 'ken 'xìn-la, tsa ngi kixi kjoa nga tsìn yá ra basikò'ta. <sup>4</sup>Tsa tjín íchjín ra ijye 'ken 'xìn-la ra tjín-la ixti, kò tsa ixti-ndíí, jñà ixti kii, ítjòn katasíhitjasòn ya ni'ya-la kó'sín nga bexkón Nainá. Katasiko xita xákjén, mé-ni nga tsjá ngajo-ila kjotsjacha xita jchínga-la. Kjoa kii, ndaá tjín. 'Koaá 'sín sasén-la Nainá. <sup>5</sup>Jè chjoón ra ijye 'ken 'xìn-la ra kixi kjoa nga tjna tajngo, jé Nainá 'nó bá'ta ikon kò nichjin kò nitjen bítsa'ba nga chja'ta-la Nainá. <sup>6</sup>Tanga jè chjoón ra ijye 'ken 'xìn-la ra kjotsja 'tse isà'nde ra 'cho tjín tsjá-la ijo-la, mi'ken-ní a'ta 'tse Nainá ni'sín tijnakon-ni ijo-la. <sup>7</sup>'Koaá 'sín takón-ya ijye-la kjoa kii, mé-ni nga nda siijchá-ni ijo-la nga mì yá ra 'cho kítsò-la. <sup>8</sup>Tsa yá ra mì kì síkinda xita xákjén nga kosiko, ma'tsia ítjòn-ni jñà ra ya tútsajna kò ni'ya-la, tsa mì kò'sín kosiko xákjén, mì kì inchisíhitjasòn 'én ra makjiín-la a'ta 'tse Cristo. Isaá 'cho inchisíkítsajna-ni ijo-la nda mí 'koa-ni koni jñà xita ra mì kì makjiín-la 'én-la Nainá.

<sup>9</sup>Íchjín ra ijye 'ken 'xìn-la ra si'ta xajon nga koma kisiko, tà jñá-ní ra tsato jàn-kan nó tjín-la ra ngi kixi tsikitsajna kò 'xìn-la. <sup>10</sup>Jñà ra 'ya-la nga nda isíjchá ijo-la 'tse xá ra nda tjín; tsa ndaá isíjchá ixti-la, tsa ndaá isisin-la xita ra ijchòjkon ni'ya-la, tsa tsiníjnoó ndsako xita-la Cristo nga nda isisin-la, tsa tsasikoó xita ra kjoa tjín-la. Tsa kò'sín isíhitjasòn nga'tsi xá ra nda tjín koma si'ta xajon.

<sup>11</sup>Tanga jñà íchjín ra ijye 'ken 'xìn-la ra 'sa ixti-isa mì kì koma xajon si'ta. 'Kia nga 'xìn kjoahajin-la, mì tsa i'in koma-la nga kìncha'taxìn-la Cristo nga kixan ijngo 'ká-ni. <sup>12</sup>Tsa kò'sín 'sjin, kjohi'íin sakò-la nga mì kì inchisíhitjasòn koni 'sín kitsjà tsa'ba nga ti'sa ítjòn. <sup>13</sup>Íchjín kii, ti'koaá mangaá-la nga jndíí ra ján minchimajto ni'ya. Ma'tsè-ní, mì tsa tà ma'tsè. Ti'koaá 'én ndiso bíxkó. Fajin fa'a kjoa ra mì ya bako-la kò taxki chjaá 'én ra mì kì bakèn-la. <sup>14</sup>'An, 'koaá 'sín mejèn-na nga katixan-ni jñà íchjín ra ijye 'ken 'xìn-la ra 'sa ixti-isa. Kata'se-la ixti. Nda katatéxoma ya ni'ya-la mé-ni nga mì 'cho kítsò-ni ra kondra fi-ná. <sup>15</sup>Tjín i'ka ra ijye tsáfaya-la, yaá kiitjngi ijngo 'ká-ila xita-níí.

<sup>16</sup>Tsa jngo xit̄a ra makjiín-l̄a 'én-l̄a Nainá tsa t̄jín íchjín xákjén ra ijye 'ken 'xín-l̄a, machjeén-ní nga katasiko xákjén mé-ni nga mì jè naxindá-l̄a Cristo 'ñó skanè-ila xá. Jè naxindá-l̄a Cristo kama kosiko jè chjoón ra ijye 'ken 'xín-l̄a ra ngi kixi kjoa nga i'in t̄jna.

<sup>17</sup>Jñà xit̄a jchínga ra nda batéxoma ya naxindá-l̄a Nainá, bakèn-l̄a nga nda jchaxkón kō t̄i'koa kisiko'ta mé ra machjeén-l̄a, ma'tsiako kjòn-ni jñà ra síxá nga chjaya kō nga bakón-ya 'én-l̄a Nainá. <sup>18</sup>Xajon ra t̄jít̄a 'Én-l̄a Nainá, 'koaá 'sín tichja nga tsò: “Jè nchraja ra síxá, k̄i na'ya bì'a tsa'ba.” T̄i'koaá t̄jít̄a-te ra tsò: “Jè xit̄a ra síxá, machjeén-ní nga katachj̄i-l̄a.”

<sup>19</sup>Kì tà chjàn nisin-l̄a tsa yá ra bángi xit̄a jchínga ra batéxoma 'tse naxindá-l̄a Nainá, tsa mì jò jàn ma-ni xit̄a ra kijtse kjòn-ni xkōn kjoa ra kjomà.

<sup>20</sup>Tanga jñà ra bátsji-jé-isa, tikjaká-l̄a ya ngixkōn nga'tsi xit̄a naxindá-l̄a Nainá, mé-ni jñà xit̄a ra i'ka, 'koaá 'sín jtsakjòn-ni.

<sup>21</sup>'Koaá 'sín t̄ibiné-la ya ngixkōn Nainá kō Jesucristo ra t̄jna ítjòn-ná kō ikjal̄i-l̄a ra xá tsjahj̄in-ni, nda t̄ihitjasin kjoa k̄i. Kì nimé kjoa ra bindajín 'kia nga tikjè 'ya-l̄a a kixi kjoa. Kì tà i'ka xit̄a chjaájin nga nda kíndajín-l̄a. Ngàsòn nda tindajín ijye-l̄a. <sup>22</sup>Kì yá xit̄a ra taxk̄i chjaájin nga kjósòn-la ndsi 'kia nga 'ki-l̄a xá ya ajin naxindá-l̄a Nainá; nda tikítsjen ítjìn mé-ni nga mì j̄i kōkō'ta-li jé-l̄a xit̄a ra kj'íi. Tsje t̄jni ra j̄i.

<sup>23</sup>Nga kō'sín ta 'chin t̄jín ki'ta-l̄a indsi'bì, k̄i tà nandá 'yì, t̄i'koaá 'tiō chibi nandá xán 'tse uva.

<sup>24</sup>T̄jín i'ka xit̄a ra t̄i'kia 'ya-l̄a jé-l̄a 'kia nga tikjè sindajín-ni. Tanga t̄i'koaá t̄jín i'ka ra askan 'ya-l̄a. <sup>25</sup>'Koaá t̄i'sín t̄jín xá ra nda t̄jiōn, t̄jín ra nditōón 'ya-l̄a. T̄i'koaá t̄jín xá ra nda t̄jiōn ra mì tsa nditōn 'ya-l̄a tanga mì k̄i kama sijna'ma ki'ta. Takó jchaa-l̄a askan-nioo.

**6** <sup>1</sup>Nga'tsi xit̄a naxindá-l̄a Nainá ra chi'nda t̄itsajna'ñó, nda katabexkōn ni-l̄a mé-ni nga mì yá ra 'cho kichhajno-l̄a Nainá kō jè 'én ra bakon-yeé a'ta 'tse Cristo. <sup>2</sup>Jñà xit̄a chi'nda ra makjiín-l̄a ni-l̄a a'ta 'tse Cristo, machjeén-ní nga t̄i'koa nda katabexkōn-te ni-l̄a, nga 'ndseé joó a'ta 'tse Cristo. Ndaá katasíxá-l̄a, nga ngàsòn makjiín-l̄a 'én-l̄a Nainá t̄i'koaá t̄jín-l̄a kjotsjacha nga 'ndse joó.

Jñà 'én k̄i, takón-yi t̄i'koa t̄ika'bísin.



### Ra ngi kjoanchiná kjohixi

<sup>3</sup>Tsa tjin xita ra kjíí tsò 'én ra bakón-ya, nga mì tjiŋgo ikon koni 'sín tsò 'én nda-la Jesucristo ra tina ítjòn-ná, tì'koa mì kì tjiŋgo ikon a'ta 'tse kjotéxoma nga 'yaxkén Nainá. <sup>4</sup>Xita kii, xita 'ngatakón-ní, nímé machiya-la. 'Nó tsjake nga bátiya-ni 'én ra nímé chjí-la. Yaá nchrabá-ni nga maxitakòn-cheé xàngieé, nga bixkàn-kjeé, nga nakjoájno-lá xàngieé 'én ra 'cho tsò, tì'koa 'cho níkijsjeén a'ta 'tse xita ra kjíí. <sup>5</sup>Tì'koaá yaá nchrabá-ni nga kji'tá nichjin nga inchikjaán-kjo jña xita ra mì kì kixi síchjeén kjobítsjen-la kò mì kì tsa nda fì'ta-la ra kjohixi. 'Koaá 'sín síkijsjen, tsò-ní: tsa nda jchaxkén Nainá, yaá sakó-ná ton. Ra ji, kì 'koaá tjin kjoa ra níkijsjin. <sup>6</sup>Kixíí kjoa, tseé kjonda sakó-la xita 'kia nga bexkón Nainá, tsa 'kia nga tsja tjin-la inìma-la mé ra tjin-la. <sup>7</sup>Nga nímé ra ki'ché 'kia nga kitsieén i isà'nde. Tì'koaá nímé ra kohíkeé 'kia nga kiyé. <sup>8</sup>Tsa tjin-ná tsajmì ra chineé kò tsa tjin-ná nikje ra tsjayeé, machjeén-ní nga tsja 'se-ná kò kíjngo-lá takén. <sup>9</sup>Tanga jña xita ra kjoanchiná mejèn-la, nda mí be-ni, yaá síkijne-la kjoa ra 'cho tjin, koni tsa 'kia jngo cho kangi chin. Jña 'ñó ma mejèn-la kjoa ra nímé chjí-la ra 'cho síko-ná. Tanga jña kjoa kii síkítsón kò síchijaá xita. <sup>10</sup>'Kia nga ton matsjacheé, yaá ma'tsia-ni kjoa 'tse jé kò nga'tsi kjoa ra 'cho tjióon. Tjin i'ka xita ra tà ngatjì-la tse ton mejèn-la 'se-la, ijyeé tsincha'taxìn-la kjoa ra makjiín-ná a'ta 'tse Cristo. 'Koaá 'sín ma-ni nga tijná 'ñó inchitsjá-ila kjohi'in ijo-la.

### Tinè-la ijo-li kjoa ra makjiín-li

<sup>11</sup>Tanga ngaji ra xita-la Nainá 'mì-li, tisen'taxìn-la nga'tsi kjoa kii. Jè 'tin-tjìngi-la ra kjohixi. Jchaxkín Nainá. Nda katakjiín-li a'ta 'tse Cristo. Kata'se-li kjotsjacha. Tsejta katama inìma-li nga ma-li jchíñakjii, kò indakjoa tikíjni inìma-li. <sup>12</sup>Nda tixkan-tjì kjoa ra makjiín-ná a'ta 'tse Cristo. Kì níkijna-jìn ndiyá kixi 'tse kjobinachon ra mì fehe'ta nita kjiá-nioo. Nga kíí xá kiichja-li Nainá. Ngaji ijyeé kò'sín nda ki'tsi ndsa'bì 'kia nga inikixiyi 'én ra makjiín-li a'ta 'tse Cristo ya ngixkòn xita ra kjin ma-ni nga kíí'nchré. <sup>13</sup>'Ndi 'ndi, jngo xá tíbiné-la ya ngixkòn Nainá ra síkijsajnakon ijye nita mé ra tjin, tì'koa ya ngixkòn Jesucristo ra nda kitsjà tsa'ba nga

isìkixiya 'én nda-là 'kia nga kiichja ya ngixkon Poncio Pilato. <sup>14</sup>'Koaá 'sín tibatexóma-la, nda tihitjasìn kjotéxoma kii; kì nímé nikaatjiya-là mé-ni nga mì koçhrjengi-li xita skanda 'kia nga kj'íí india-ni Jesucristo ra tìjna ítjòn-ná. <sup>15</sup>'Kia nga kijchò nichjin-là, jè Nainá, 'koaá 'sín s̄hitjasòn ijye kjoa kii. Nga ta jè tajngoó-ni ra 'nõ tibatéxoma ko nga tse kjonda tijnajin ra jè. Jé tìjna ítjòn-là jñà ra xitaxá ítjòn títsajna, tì'koa tìjna ítjòn-là jñà ra xita ítjòn títsajna. <sup>16</sup>Tajngoó Nainá ra xá ko'sín tìjna-ni nga mì kì biya. Yaá tijnajin kjoahisen nándà nga mì yá ra koma kijchò ka'ta-la. Nì kjè sa jngo xita be, nì mì kì tjí'nde-là nga ske. Nainá, kjitá nichjin jeya katijna. Kata'yaxkón kjotéxoma-là nita kjiá-nioo. Ko'sín katama.

<sup>17</sup>Jñà xita nchiná ra tìjn i isà'nde, 'koaá 'sín 'nõ tì'tin: kì bá'nga-là ikon. Kì ya ma'nó'ta ikon kjoanchiná ra tìjn-là ra tà nditon fehe'ta. Jè katama'nó'ta ikon Nainá ra tijnakon, nga jé tsjá ijye-ná ra machjeén-ná, skanda síkatoné-là mé-ni nga ko kjotsja-ná sichjeén tsajmì ra tsjá-ná. <sup>18</sup>Ko'tin-là, kjonda kata'sín. Kata'se-là kjoanchiná ya ngixkon Nainá a'ta 'tse kjonda ra 'siin. Kì kjoxkon fí'ká, ngi koó inìma-là katatsjá itsé-là xákjién mé ra tìjn-là. <sup>19</sup>Tsa ko'sín s̄hitjasòn nichjin 'ndi 'ndi, 'séé-là kjoanchiná ra mì kì fehe'ta 'kia nga ijye títsajna ya ngixkon Nainá. Tì'koaá tjábé-là kjonda ra ngi 'tse kjobinachon.

### Tihitjasìn xá ra Nainá kitsjà-li

<sup>20</sup>Ngaji Timoteo, nda tihitjasìn 'én nda-là Nainá ra jì kjongatsji. Kì jñà na'yá-là 'én ndiso ra nímé chjí-là, ko kì jñà nisin-là kjoa ra chitiya-ná 'tse kjochjine ra 'én ndiso. <sup>21</sup>Tjín i'ka xita ra kotjín kjobítsjen fitjingi-là. 'Koaá ma-ni mincha'taxìn-là kjoa ra makjiín-ná a'ta 'tse Cristo.

Nainá katasíchikon'tin-li. Ko'sín katama.